



Broj: 02-49-2-202/16

Datum: 21.01.2016.

OPĆINSKO VIJEĆE TEŠANJ

Predmet: Informacija o realizaciji strategije razvoja općine Tešanj



Općinsko vijeće Tešanj je u aprilu 2013. godine usvojilo Strategiju 2018., planski dokument kojim je odredilo smjernice razvoja općine Tešanj do 2018. godine, definišući programe i projekte na kojima je potrebno raditi u narednim godinama.

Odlukom je definisano da se operativna odgovornost realizacije prenosi na Općinskog načelnika (određivanje prioriteta i nosioca realizacije) i određuje obaveza godišnjeg informisanja Općinskog vijeća o realizaciji postavljenih ciljeva. Općinsko vijeće je dodatno, svojim Programom rada za 2016. godinu potvrdilo potrebu da se informiše o realizaciji strateških dokumenata općine Tešanj. Shodno tome, nastala je i ova Informacija.

Metodologija realizacije strateških dokumenata, tj. metodologija strateškog razvoja uopće u općini Tešanj ima vrlo jasnu strukturu po pitanju organizacije i odgovornosti. Krajem jedne i početkom nove kalendarske godine identifikuju se ciljevi projekte i programi koji ulaze u operativnu realizaciju tokom date godine, a koji su definisani strateškim dokumentima (na osnovu preduslova za realizaciju, postavljenih rokova, prilika u budžetima javnog sektora i mogućnosti za realizaciju projekta bez troškova općine i dr.). Tom prilikom se osim odabira projekata utvrđuju i menadžeri/nosioci projekata. Za svaki od projekata ili programa, postoji opis, razrađen je konkretan plan aktivnosti, sa planiranim rokovima i postoje mjesečni izvještaji o realizaciji koji su elektronski dostavljani Općinskom načelniku.

Osvrt na ukupni stepen realizacije Strategije 2018

Strategija 2018 u planskom dijelu sadrži definisana 63 programa/projekta kao ciljeve koje je potrebno dostići, sa opisanim opisom opravdanosti, indikatorima, potencijalnim učesnicima, procijenjenim iznosima, predloženim dinamikom itd. Osim toga, na pomoćnoj listi nalaze se programi projekti koji nisu u nadležnosti općine Tešanj, njih ukupno 10. U prethodnim godinama (2013, 2014 i 2015) u realizaciji je bilo 74 programa/projekta (s napomenom da su u 2013. godini bili jošš aktuelni projekti iz ranijih strateških dokumenata). Na kraju 2015. godine pregled realizacije bi se mogao prikazati i na slijedeći način:



Na početku 2015. godine identifikovano je **27 ciljeva (projekta/programa) za realizaciju**: U nekim slučajevima je riječ o programima sa niz pojedinačnih projekata, a u drugim slučajevima je riječ o pojedinačnim projektima koji su planirani za jednogodišnju ili višegodišnju realizaciju (po fazama ili u cjelini). Izvještavanje se vrši mjesečno, a analiza mjesečno, kvartalno ili polugodišnje.

U nastavku je sačinjen kraći pregled koji sadrži samo osnovne informacije o realizaciji planiranih aktivnosti po programima i projektima iz Strategije. Informacija bi mogla sadržavati mnogo više sadržaja i detalja o svakom od projekata (neki od projekata ili programa imaju toliko informacija i detalja da bi se o njima moglo pisati desetak stranica), ali smo smatrali ovakav oblik informisanja primjerenim za razumijevanje suštine rada na realizaciji Strategije.

1. Opremiti poslovne zone sa infrastrukturnim sadržajima

Realizacijom ovog projekta u 2015. godini realizirane su značajne aktivnosti na gradnji i uređenju poslovne infrastrukture. Konkretno, tokom 2015. godine:

- Dovršena eksproprijacija na pripremi za gradnju nove saobraćajnice u poslovnoj zoni Glinište. U ovu namjenu izdvojeno je cca 180.000 KM, a kupljenja je **dužina puta 755 m širine 12 metara**. Direktno je isplaćen određeni iznos, dok je za dio eksproprijacije vršena zamjena zemljišta ili kompenzacija finansijskih obaveza koje su postojale prema općini.
- Putem javne nabavke **ugovoreni i izvedeni** radovi na trasiranju (otkop zemlje, formiranje trase i nasipanje u dva sloja, zgradnja propusta) nove saobraćajnice u poslovnoj zoni Glinište (dužine 755m, širine 12m). Vrijednost izvedenih radova je **113.464 KM**, a sredstva su obezbijedena od Fondacije OdRaz i općine Tešanj.
- Završena izrada projektne dokumentacije za **regulaciju potoka Radušica**. U drugoj polovini godine kandidovan projekat za finansiranje ovog projekta od Ministarstva privrede ZDK. Projekat odobren i Ministarstvo je prihvatilo refundaciju troškova **u vrijednosti cca 15.000 KM**.
- Završena realizacija ugovora iz 2014., za rekonstrukciju puta sa izgradnjom potrebnih instalacija od nekadašnjeg izbjegličkog naselja prema magistralnom putu M4. **Vrijednost izvedenih radova je cca 170.000 KM**. U 2014. g su izvedeni radovi na pripremi trase i ugradnji instalacija (vrijednost 66.000 KM). U 2015. godini završeni su asfalterskih i prateći radovi.
- Okončani radovi (ugovoreni krajem 2014. godine) na rekonstrukcija dalekovoda KB 10(20) kV At Mejdan-Poslovna zona Ciglana, tj. premještanje nadzemnih u podzemne instalacije. Općina sudjeluje na način da je prihvatila troškove od **16.399 KM** za sve zemljane radove, a elektrodistribucija obezbjeđuje potrebni materijal i i elektro radove (cca 180.000 KM). Značajno je da se ovim projektom **oslobađa dio poslovne zone Ciglana za novu upotrebnu vrijednost i gradnju objekata, kao i dio buduće zone Glinište**.
- Okončani radovi na uređenju poslovne zone Ciglana (ugovor iz 2014. godine) koji su čekali na rekonstrukciju dalekovoda (jer je trebalo urediti dio trotoara i trase kojom su bili predviđeni radovi na dalekovodu) cca **15.000 KM**
- Uređenje poslovne zone Ciglana realizacijom planiranih aktivnosti u Listi kapitalnih projekata 2015. **15.000 KM**
- Završeno obilježavanje poslovnih zona saobraćajnom **signalizacijom** (kroz ranije obezbijeden projekat),
- Izvršena je **sanacija** ucijevljenog potoka u poslovnoj zoni Vila. Projekat je na zahtjev općine finansiran od strane SGI.
- Za izgradnju rasvjete u Poslovnoj zoni Bukva pribavljene potrebne saglasnosti i dozvole, te uz kopanje kanala koje je izvela Elektrodistribucija (zbog gradnje nove trafo-stanice) postavljeni alkaten vodovi. Gradnja nije završena, jer nije bila planirana finansijski za 2015. godinu, zbog drugih prioriteta.

Osim fizičkog uređenja poslovne infrastrukture, tokom 2015. godine pokrenute su i vođene značajne aktivnosti na izmjeni i ažuriranju prostorno-planske dokumentacije (dvije izmjene na RP Glinište, odluka o izmjeni RP Industrijska zona Bukva i njenom proširenju). Ukupno uložena sredstva u realizaciju programa tokom 2015 godine iznose **584.860 KM** (uključujući završene projekte koji su započeti u 2014). Ovo ne uključuje sredstva investirana u gradnju treće trake u poslovnoj zoni Bukva i sredstva Elektrodistribucije.

2. Iznaći dodatnih 15 l/s pitke vode

Predviđeno je da se u planskom periodu ostvari strateški cilj povećanja kapaciteta vodoizvorista i obezbjeđenja novih količina pitke vode (15 s/l). U ovoj godini izvršeno je puštanje u funkciju novog bunara u Miljanovcima.

Postoji glavni projekat, revizija projekta i obezbijedena urbanistička saglasnost za gradnju nova dva probno-eksploataciona bunara (PEB) u Jelah polju. **Procijenjena vrijednost** radova za bunar **PEB 1** je **cca. 575.000 KM**, za **PEB 2** je **cca. 195.000 KM**.

Tokom pribavljanju odobrenja (potrebnih dozvola koje se izdaju prema mjesnoj nadležnosti) za PEB 2, koji je lociran na prostoru općine Usora (jer je ovaj bunar jeftiniji za izradu zbog već postojećih instalacija, i jer se očekuju se isti otprilike efekti u pogledu kapaciteta vode) došlo je do zastoja.

Općina Usora je kroz Općinski tim, a i kroz direktnu pismenu komunikaciju prema KP Rad otvorila pitanje vlasništva nad objektima i zemljištem, tvrdeći da je formiranjem nove općine i razgraničenjem sa općinom Tešanj bunar i okolno zemljište postalo vlasništvo općine Usora. U međuvremenu općina Usora je apelacijom kod Ustavnog suda dokazala da je povrijeđeno pravo na lokalnu samoupravu kod donošenja Odluke o zaštitnoj zoni, koju je donio Zeničko-dobojski kanton u 2010. godini. Od općine Usora su istaknute primjedbe na obuhvat zaštitne zone i trenutno je u toku priprema novog Elaborata o zaštitnim zonama, kojim će se uz novi pravilnik (sa federalnog nivoa) preispitati zone zaštite. Pored toga općina Usora je naglašavala i problem umanjeње iskorištenosti zemljišta u zaštitnim zonama (javnog i privatnog) zbog postojanja ovih zona. Prvenstveno zbog ovih razloga nije došlo do intenziviranja pripreme gradnje jeftinijeg bunara.

3. Okončati projekte izgradnje vodovodnih sistema O. Planje, Mekiš-Dobropolje, Medakovo-Trepče, Hrvatinoći, Raduša

Program je dosta široko postavljen i uključuje višegodišnju realizaciju nekoliko većih projekata. Općinsko vijeće je određenim odlukama učestvalo u odluci o finansiranju ovih projekata. Konkretno:

Dovršeni su projekti iz 2014. godine koji su bili relativno kasno ugovoreni ili privremeno zaustavljeni zbog građevinske sezone:

- Realizovana II faza rekonstrukcije cjevovoda u ulici Alipaše Hećimovića, zamjena azbestnih cijevi, (vrijednost materijala **55.000 KM**, izvođenje je bilo o trošku JP Rad)
- Završena **izrada projekta** vodovoda za Dž. Planje (**cca 15.000 KM**),
- Realizovana s kraja 2014. godine na vodovodu Medakovo-Trepče (izvođač JP Rad) vrijednost cca. **175.000 KM**,
- Završena izgradnja drugog rezervoara na vodovodu Tepe-Hrvatinoći (**cca. 60.000 KM**),
- Realizovan veći dio projekta vodovoda Roše (**cca. 57.000 KM**), preostalo učešće građana,

Vrijeme ugovaranja projekata iz 2015. godine (koji su bili na Listi kapitalnih za 2015. godinu, a finansiraju se iz vodnih naknada), bilo je uslovljeno usvajanjem Programa utroška.

Ugovoreno je i realizovano:

- Na vodovodu Medakovo-Trepče, tokom 2015. godine ugovoren je i realizovan projekat iz sredstava prikupljenih od građana u vrijednosti cca **208.000 KM**, koji je podrazumijevao spajanje ovog vodovodnog sistema na mrežu u Čifluku, povezivanje svih rezervoara i izradnju dijela distributivnih vodova,
- Urađena rekonstrukcija vodovodne mreže u Titovoj ulici u Tešnju i dio ispred Doma kulture (zamjena azbestno-cementnih cijevi), (**60.000 KM**),
- Hidrološka analiza analiza u vezi spajanja vodovoda Medakovo-Trepče, **20.000 KM**,

Do kraja godine putem javne nabavke ugovoreno je nekoliko projekata:

- Vodovod Medakovo-Trepče - sedma, preposljednja faza izgradnje vodovoda, u kojoj se realizuje izgradnja velikog dijela distributivne mreže i dio sekundarnih vodova. Vrijednost cca **116.000 KM**,
- Nastavak gradnje kanalizacione mreže u MZ Šije, vrijednost cca. **25.000 KM**
- Proširenje vodovodne mreže u naselju Joldići, vrijednost cca. **20.000 KM**

Ukupna vrijednost novih ugovorenih (i jednim dijelom izvedenih) radova u 2015. godini je **250.000 KM**.

Radi jasnoće pregleda dajemo nekoliko općih informacija o stanju planiranih i započetih projekata vodovodna infrastrukture:

Projekat vodosnabdijevanja **O. Planje** je završen kada su u pitanju finansijske obaveze općine Tešanj. I dalje se radi na izmjeni i proširenju sekundarne mreže.

Vodovod Hrvatinovići – izgrađena do sada dva rezervoara vrijednosti oko **140.000 KM** gdje je ukupna projektantska vrijednost kompletnog projekta je cca. 650.000 KM. Potreban je značajniji angažman građana kako bi se ispoštovala Odluka o učešću 60/40 %.

Projekat Medakovo Trepče - ugovoreno je i realizovano 7 faza projekta. Izgrađeni su svi rezervoari (5), međusobno povezani i povezani na sponom mjestu Čifluk. Postoji još jedna ugovorena faza za dio distribucionih vodova i sekundarne mreže. U prethodne tri godine realizirano projekata, ugovoreno i utrošeno oko 920.000 KM (sredstva budžeta i građana). Po grubim procjenama na osnovu projektne dokumentacije preostaje još radova u vrijednosti cca 400.000 KM, u kojima bi općina trebala putem budžeta trebala učestvovati sa oko 100.000 KM, a građani-učesnici projekta oko 300.000 KM.

Projekat Raduša - Do sada obezbijedena sva projektna dokumentacija (idejni, izvedbeni projekat, hidrološka analiza, donesene potrebne odluke za imovinsko-pravne odnose) i projekat je spreman za realizaciju. U pripremu projekta izdvojeno **73.125 KM**, budžetskih sredstava. Na ovim projektima su bili angažovani Sabahudin Omerbašić, Hajrudin Subašić i Selvedina Sejmenović.

4. Dopršiti izgradnju III trake u Bukvi

U drugoj polovini 2014. godine Svjetska banka je putem UNDP-a donatorskim sredstvima, sa Federalnim ministarstvom odlučila podržati gradnju poslovne infrastrukture. Općina Tešanj je pripremila aplikaciju, koja je prihvaćena sa drugih 10 iz cijele FBiH (od cca 60 kandidovanih) i tokom decembra, potpisan je novi ugovor za realizaciju još jedne faze gradnje III trake. U 2015. godini provedena je javna nabavka i ugovoreni radovi. U maju i aprilu 2015. završena izgradnja novih **337 m** treće trake u cilju sigurnijeg odvijanja saobraćaja i prevoza roba i materijala kroz Industrijsku zonu. Ugovorom broj: 02-49-1-288-20/15 od 22.04.2015. godine i anex-om Ugovora broj: 02-49-1-288-21/15 od 06.05.2015. godine definisani su radovi u predmetu izvođenja radova na nastavku izgradnje treće trake kroz industrijsku zonu "Bukva" u Tešnju, između Općine Tešanj kao naručioca i „Rial-šped“ d.o.o. Dobož Istok kao izvođača radova. Vrijednost ugovora je **179.984,98 KM**. Radovi su završeni u ugovorenom roku i okončani 20.05.2015. godine. Izvještaji o provedenoj proceduri javne nabavke i same realizacije projekta su prihvaćeni od strane Federalnog ministarstva razvoja, poduzetništva i obrta te je izvršena uplata i poslednje tranše. Ovo su bili prvi podneseni izvještaji o završetku projekta i ocijenjeni su kao uspješni.

Tokom radova na izgradnji primarne kanalizacione mreže izvedeni su radovi na proširenju saobraćajnice i izgradnji dijela treće trake u dužini od **230 m**, bez gornje presvlake, vrijednosti cca **80.000 KM**.

U drugoj polovini 2016. godine raspisan je javni poziv za nove projekte. Budući da je općina Tešanj uspješno implementirala prethodni projekat i da je bio prihvaćen izvještaj, odobren nam je novi projekat u iznosu od 200.000 KM. Jedina općina smo u FBiH kojoj je prihvaćena realizacija nova faza projekta (kandidovano oko 70 projekata za FBiH, **odobreno 11**). Za 2016. godinu odobrena dodatna sredstva u iznosu **od 200.000 KM**. Već je pokrenuta procedura javne nabavke za VI dionicu navedene trase u dužini od **320 m**. Ovo je posljednja dionica na gradnji postojeće III trake unutar postojeće Industrijske zone Bukva.

U 2015. godini ugovorena je izrada projektne dokumentacije za izgradnju treće trake od Toplane do kružnog toka u Tešnju. Projektovanje je u toku i biće okončano u prvom kvartalu 2016. godine. U 2016. godini u okviru ovog programa u namjeri smo pripremiti projektnu dokumentaciju za zgradnju sekundarnih saobraćajnica za proširenje Industrijske zone Bukva. Menadžer projekta bio je Hajrudin Subašić, a u pripremi projekata i njihovom izvještavanju sudjelovali su i drugi.

5. Povećati elektro-energetske kapacitete za potrebe privrede i lokalne zajednice - Izgradnja 110 KWTS Jelah

Projekat je dio Strategije 2018 zbog toga što su elektroenergetski kapaciteti općine Tešanj bili prilično opterećeni, skoro da bi bili ograničenje u razvoju i instaliranju iole ozbiljnijeg proizvodnog pogona koji

zahtijeva potrošnju veće količine električne energije. U 2014 godini upravi Elektroprenosa je stavljeno do znanja da postoji veliki interes lokalne zajednice za ovaj projekat. Ponuđena je podrška i saradnja općine Tešanj interes da se što prije pristupi realizaciji gradnje nove 110 kw/TS. Gradnjom **nove trafostanice općina Tešanj** bi imala napajanje sa tri dalekovoda iz tri pravca, te bi imala obezbijedene količine električne energije za narednih 20-tak godina. Osim trafostanice, potrebno je izgraditi i novi dalekovod Bukva-Jelah.

Nakon što je općina Tešanj dostavila potencijalne lokacije za novi bojekat TS, zbog „stajanja u mjestu“ općina je slala urgencije. Nakon određenog vremena tražen je odabir predstavnika koji bi radili na odabiru lokacije. Inicijativom općine realizovani su novi sastanci te organiziran i terenski obilazak lokacija. Nadamo se što skorijem odabiru lokacije i daljem nastavku projekta. Vijeće će biti uključeno u toj fazi kroz adekvatne odluke.

6. Uređenje turističko-rekreativne zone Kiseljak prema postojećem RP

Implementacija postojećeg RP Kiseljak dio je strateškog plana i nastojanja općine Tešanj. U 2015. godini traženi su modeli i načini aktivnijeg rada na implementaciji RP Kiseljak. Analizirano je stanje postojeće infrastrukture (električne energije, vodosnabdijevanja i dr.), te ispitivan interes za moguće investicije i ulaganja. Uz sva postojeća ograničenja (količinu i atraktivnost površina koje su „u vlasništvu“ općine Tešanj, otvorena pitanja u vezi s budućom izgradnjom Koridora 5c i sl.) traženi su mogućnosti za investiranje. Na iskazani zahtjev izvršena je analiza mogućnosti za gradnju objekta za punionicu vode. Postoje mogućnosti da će biti potrebe za izmjene regulacionog plana.

7. Socijalno uključivanje ranjivih kategorija djece

Tokom 2015. godine završena je revizija projekta izgradnje novog prostora za rad sa djecom sa poteškoćama u razvoju. Nakon toga obezbijedene su potrebne dozvole. Kako je ranije bilo dogovoreno sa donatorom, radoi su zvanično počeli u maju 2016. godine. Najveći dio građevinskih radova u vrijednosti cca 280.000 KM bili su donacija Hajrudina Ahmetlića, a općina je preuzela dio potrebnih troškova (potporni zid, zamjena ograde, ulazna kapija, popravka fasade na ostatku objekta Obdanište, dio opremanja objekta centralnim grijanjem). U opremanju i radu dnevnog boravka tokom 2015. godine korištena su donatorska sredstva Mann+Hummel BA, Regeneracija, Velika Kladaša i dr. Objekat je svečano otvoren 29.10.2015. godine.

Tokom 2015. godine i dalje je obezbijeden (bez obzira na građevinske radova na objektu) rad sa ovom djecom putem Centra za socijalni rad i Udruženja roditelja (zgrada CKO). Projekat je i u 2015. godini kao i svih prethodnih godina dominantno finansirala općina Tešanj. Nakon završetka gradnje i proširenja postojećeg objekta otvoreni su razgovori sa resornim Ministarstvom rada i socijalne politike o drugačijem organizacionom djelovanju i sufinansiranju ove aktivnosti od ZDK. Usaglašene su aktivnosti i Vlada ZDK je već donijela odluku o uspostavljanju nove organizacione jedinice u postojećoj ustanovi (čije je sjedište u Zenici), koja će imati odjeljenja za Tešanj i Visoko, te Maglaj i žepče u narednoj fazi. Troškovi će se nakon izgradnje objekta uvećati, ali će obaveza općine biti učešće od 1/3 ukupnih troškova. Osim toga, biće ponuđeno općinama Doboj Jug i Usora da koriste kapacitete organizacione jedinice u Tešnju. Puna primjena očekuje se usvajanjem Budžeta ZDK.

8. Podsticanje edukacije nosilaca aktivnosti u NVO

Održana jednodnevna obuka 25 predstavnika udruženja građana od svih pozvanih sa kojima je Općina Tešanj sklopila ugovor o finansiranju projekata za 2015. godinu.

Obukom su obrađene teme:

1. Obaveze UG koje prosiću iz ugovora, način uplate finansijski sredstava
2. Način izvještavanja i dokazivanje utroška sredstava od strane UG
3. Iskustva Monitoring tima
4. Informisanje javnosti o provedenim projektima, medijska promocija aktivnosti

Osim toga održan je info dan - dan otvorenih vrata gdje je obrađen način apliciranja na javni poziv općine. Menadžer projekta Mirnes Dedukić.

9. Unaprijediti javno informisanje o djelovanju NVO

Ideja i smisao cilja iz Strategije leži u potrebi da se rad brojnih udruženja građana učini dostupnijim u svakodnevnoj komunikaciji te time, s jedne strane pruži jedna jasnija i cjelovitija slika o doprinosu NVO sektora u životu cijele zajednice, te s druge strane kroz organiziranije informisanje omogućiti i bolje sagledavanje pozitivnih društvenih efekata/doprinosa pojedine organizacije.

Planirane aktivnosti podrazumijevaju organizovanje osnovne informacije o udruženjima građana na web stranici općine, te objedinjavanje sedmičnih aktivnosti svih sportskih klubova (rasporeda takmičanja, rezultata i dr.) na jednom mjestu. Dio aktivnosti i priprema je realizovano u 2014. godini, a u 2015. godini počela je sa radom i web stranica Sportskog saveza www.sportskisaveztesanj.ba na kojoj su zastupljeni svi sportski klubovi sa područja općine Tešanj. Pregledi svih sportskih susreta i rezultata, najave sportskih susreta, rad udruženja, teme su koje se sada mogu pročitati na jednom mjestu.

10. Snažnija disperzija javnih kulturnih sadržaja izvan općinskog središta

Cilj je uspostaviti snažniju disperziju (širenje) javnih kulturnih sadržaja izvan općinskog središta, jednim dijelom kroz realizaciju kulturnih sadržaja tri općinske manifestacije (i putem javnih ustanova u kulturi) i druge manifestacije izvan općinskog središta u Tešnju, Jelahu, Tešanjci i dr. mjesnim zajednicama. U 2015 godini doprinos realizaciji je postojao i kroz primjenu Odluke o obilježavanju značajnih datuma. Kroz općinske manifestacije usmjeren je dio aktivnosti izvan Tešnja, a kroz primjenu odluke organizovani su sadržaji u Planjama, Mrkotiću, Vukovu, Karadaglijama, Šijama, Tešanjci... Doprinos realizaciji ukupnih efekata svakako su dale i manifestacije obilježavanja dana MZ u Trepču, Jablanici, Kraševu, Bobarama, Tešanjci..., te manifestacije Jelaško ljeto i Julske manifestacije na Tešanjci. U 14 mjesnih zajednica je organizirano obilježavanje dana MZ na posebnim programima i različite načine: sportom, zabavom, kulturnim ili vjerskim programima itd. Osim toga realizirano je i 19 drugih samostalnih sadržaja ili u okviru općinskih manifestacije. U ovu namjenu utrošeno je tokom cijele godine utrošeno je cca 32.000 KM.

11. Nastavak i unapređenje zaštite, istraživanja i proučavanja kulturne povijesti

Radom na strateškom cilju "Nastavak i unapređenje zaštite, istraživanja i proučavanja kulturne povijesti" nastavljen je realizacija misije, a s ciljem dostizanja što skorije vizije Javne ustanove Muzej Tešanj. Dugoročno ovaj projekat uključuje istraživanje i prezentiranje rezultata iz nekoliko oblasti kao što su:

- istraživanje administrativnog položaja i ustrojstva Tešnja kroz različite periode historije (historijske administrativne jedinice čiji centar ili sastavni dio bio i Tešanj, šire ili uže historijske karte administrativnih oblasti u kojima je bio Tešanj), naročito od austrougarske vladavine do agresije 1992. godine,
- demografske prilike i urbanizacija
- historija sudske vlasti, obrazovanja, zdravstva
- znamenite ličnosti iz tešanjke historije: načelnici općine, kotara, sreza- zavisno od perioda, intelektualci, vjerski dostojanstvenici, nosioci privrednog razvoja, visoki politički dužnosnici, narodni heroji...
- privredni tokovi u 20. stoljeću: poljoprivreda, industrija, trgovina,

Iako se radi o dugoročnom cilju vezanom za strateški razvoj Općine do 2018., tokom 2015. godine intenziviran je rad na istraživanju lokalne historije iz nekih od navedenih oblasti. Istraživački rad tokom 2015. uglavnom bazirao na obilasku arhiva, biblioteka i muzeja s namjerom da se dođe do što kvalitetnijih i pouzdanijih izvora na osnovu kojih će se raditi prezentacija kulturne povijesti Tešnja i okoline.. Konaktirani su: Državni arhiv, Zemaljski muzej, Arhiv tuzlanskog kantona, Arhiv RS, i dr.

Krajem 2015. godine u saradnji sa Bibliotekom Tešanj priređena je izložba iz jednog dijela realizacije Cilja „Mesud ef. Smailbegović“, a tokom 2016. godine očekuje se privođenje kraju još dva ili tri podprojekta iz ovog okvira, s obzirom da se radi o široko postavljenom strateškom cilju. Menadžer projekta Ernad Prnjavorac.

12. Dovršetak izgradnje objekta Biblioteke

Projekat izgradnje objekta biblioteke prvotno je bio projekat planiran za realizaciju kroz Strategiju razvoja općine Tešanj 2007-2014. Nakon objedinjavanja strateških dokumenata, a budući da nije bio u potpunosti realiziran zadržan je u novoj Strategiji. Prvu fazu projekta (koja čini cca 50% ukupne investicije) realizirala/finansirala je općina. U 2011. godini (novembar) uspostavljen je kontakt sa Turskom upravom za međunarodnu saradnju i razvoj (TIKA) kojoj je **predloženo da se projekat dovrši kao partnerski projekat (50%:50%) općine Tešanj i TIKA**. Projekat je vođen kroz godišnje ciljeve, a menadžer za projekat je bio Esmir Bašić. Nakon mnogobrojnih pisanih i usmenih komunikacija, nekoliko uzvratnih posjeta u prvoj polovini 2015. godine, potpisan je **ugovor sa izvođačem u vrijednosti od 265.000 eura**. To je uključivalo ostatak svih građevinskih i zanatskih radova na objektu koje je preuzela finansirati TIKA. Obaveza općine Tešanj bila je da obezbijedi nabavku potrebne opreme, polica, namještaja, izgradi toplotnu podstanicu, organizuje preseljenje i sl. Općina Tešanj je sudjelovala u ovoj fazi projekta sa cca. 50.000 KM. Projekat je tokom ljetnih mjeseci i okončan, te je upriličeno svečano otvorenje 9. septembra 2015. godine.

Ukupno vrijednost projekta iznosila je **1.119.750 KM**, (učešće TIKA 516.750 KM ili **46%**, općina Tešanj 603.000 KM ili **54%**).

Realizacijom ovog projekta izgrađena je prva i jedina biblioteka općinskog nivoa, nakon završetka agresije na BiH i tešanjka biblioteka konačno ima adekvatno uređen „svoj“ prostor. Ostaje nada i očekivanje da će ovaj projekat biti podrška stasavanju novih generacija mladih tešnjaka, koje će biti ponos Bosne i Hercegovine i općine Tešanj.

13. Izrada jedinstvenog općinskog dokumenta u oblasti sporta

Nakon što su u 2014. godini završene određene aktivnosti u izradi Jedinstvenog općinskog dokumenta u oblasti sporta, koje se odnose na realizaciju Okruglog stola, anketiranje učenika i nastavnika osnovnih i srednjih škola te analiza prikupljenih sadržaja, došlo je do okončanja planiranog projekta.

U 2015. godini izvršena je analiza stručne osposobljenosti trenerskog kadra, završene aktivnosti po pitanju zdravstvene zaštite sportista, te analiza nezastupljenih grana sporta (plivanje i atletika). Ponovljeno je i anketiranje klubova u cilju prikupljanja statističkih podataka (brojno stanje, starosna i polna struktura, treneri, finansiranje itd) budući da su raniji podaci prikupljeni u 2013. godini, na početku izrade dokumenta.

Takođe su izvršene analize i doneseni određeni prijedlozi i zaključci po pitanju finansiranja sportskih klubova a izvršeni su i uvidi u rješavanja određenih pitanja iz sporta u drugim općinama u BiH.

Potom je uslijedila finalizacija dokumenta: unošenje podataka, završne analize i utvrđivanje konačnog teksta dokumenta. Do kraja maja 2015. godine završene su sve aktivnosti na izradi dokumenta. Konačan tekst dokumenta - Prijedlog jedinstvenog općinskog dokumenta u oblasti sporta je finaliziran kao razvojni dokument Sportskog saveza. Menadžer projekta Mirsad Srkalović.

14. Deminiranje sumnjivih površina I i II kategorije i njihovu redukciju putem generalnog i tehničkog izviđanja i čišćenja mina

Najznačajnija aktivnost tokom 2015. godine što se tiče ovog cilja odnosila se na usaglašavanje dokumentacije i aplikacije kod Vlade Japana, za tri projekta koja smo kandidovali (Lončari-Podkomin P=93.251 m², Vrela-Cevna zemlja P = 43284 m² i Kalošević-Bugarinovići 3 P=57.971 m² što čini ukupnu površinu od :194.506 m²) za realizaciju od preostalih srestava u iznosu od 198.184,20 KM. Naime, ovo je nastavak aktivnosti iz 2014. godine kada je Općina Tešanj, putem Službe civilne zaštite podnijela aplikaciju za dodjelu grant sredstava za projekte deminiranja u okviru projekata za dodjelu grant pomoći za temeljne projekte Vlade Japana (GRASS ROOTS). Tokom maja 2015. godine upriličena je posjeta predstavnika Japanske ambasade. Predočene su sve dosadašnje aktivnosti i izvršen monitoring projekata na terenu koji su ranije realizovani i projektata koji su kandidovani za utrošak preostalih srestava. BH MAC je izvršio reizviđanje preostala dva projekta sa liste za Japansku ambasadu. Izvršeno je prikupljanje ponuda za tri projekta i dostavljeno Japanskoj ambasadi na daljnji postupak. Kompletna aktivnost je privedena kraju, te se očekuje konačna odluka Japanske Vlade o realizaciji preostalih srestava. Menadžer projekta je Mensur Saletović.

15. Realizovati projekat prikupljanja, odvodnje i prečišćavanja otpadnih voda – I faza



U 2015. godini vođene su slijedeće aktivnosti na realizaciji projekta:

- Izrađena je Studija izvodljivosti za jedinstveno Postrojenje za tretman otpadnih voda za tri općine (Tešanj, Doboju Jug i Usora). Početkom mjeseca jula u prostorijama općine održana prezentacija na kojoj su učestvovali: izrađivač, revident, načelnici općina sa saradnicima i zajednička Komisija sastavljena od predstavnika tri općine. Studija je dokazala je lokacija na Kraševu najpogodnija za gradnju "Postrojenja"
- Na osnovu pripremljene i od strane PMU-a odobrene TD za gradnju dijela kolektora BV
- Na osnovu aktivnosti iz prethodnih godina i dobivenih saglasnosti urbanističku i građevinsku dozvolu za ove radove je izdala općina Tešanj.
- Objavljen tender za izvođenje radova. Dionicu kolektora od JP Rad do Novog Sela zajedno sa radovima na rekonstrukciji Titove ulice u 2 lota na tenderu su dobile firme Euro-Asfalt i HP Investing. Ugovoreni i izvršeni radovi su iznosili cca 2,7 mil. KM bez PDV-a.
- Nakon ponovljenog tendera posao na izradi izvedbenog projekta sekundarne, tercijarne i mreže kućnih priključaka dobila je firma Saraj Inženjering d.o.o. Sarajevo u iznosu od 116.397,62 KM. Ugovor je potpisan 08.07.2015. godine a rok izvršenja je 180 dana.
- Pripremljena i donesena Odluka o utvrđivanju javnog interesa, te pokrenut postupak eksproprijacije za zemljište potrebno za gradnju postrojenja
- Na kolektoru BI od Mračaja do Kraševa osim teritorije općine Usora završene su aktivnosti na rješavanju imovinsko pravnih odnosa. Sa JP Ceste FBiH vršene su intezivne konsultacije i usaglašavanja oko načina korištenja zaštitnog pojasa puta za potrebe buduće gradnje kolektora.
- Urađena je TD za planirane radove na kolektoru BI, planirano je da izvedu radovi, kroz 2 lota, i to dionice Mračaj-Ljetinić i dionica Tešanjka-Kraševu. Predračunska vrijednost radova je cca 3 mil. KM.
- Pokrenuta je aktivnost na obezbjeđenju projektnog zadatka za izradu Idejnog projekta za Postrojenje za preradu otpadnih voda za tri općine. Izrada projektne dokumentacije za ovaj objekat će se vršiti po Fidic pravilima-Žuta Knjiga.

Tokom 2016 godine planirane su slijedeće aktivnosti :

- Pribavljanje neophodnih saglasnosti i izdavanje urbanističke i građevinske dozvole za planirane radove na kolektoru BI
- Dobivanje saglasnosti na TD i objavljivanje tendera izgradnja planiranih dionica na kolektoru BI
- Izrada i usvajanje Izvedbenog projekta sekundarne i tercijarne i mreže kućnih priključaka.
- Ugovaranje i izrada Idejnog projekta za Postrojenje za preradu otpadnih voda.
- Angažovanje i animiranje svih relevantnih faktora za iznalaženje donatorskih i dr sredstava za uspješan nastavak realizacije projekta.
- Intezivirati saradnju i dogovaranje sa općinom Usora oko pitanja prelaska kolektora preko njihove teritorije.
- Dalje rješavanje imovinsko-pravnih odnosa i eksproprijacije
- Završetak glavnog projekta sekundarne i tercijarne mreže
- Priprema treće dionice radova na izgradnji primarne mreže (potrebne dozvole, priprema tendera...)
- ...

16. Rješavanje opasnog otpada

Smisao cilja je zbrinjavanje opasnog otpada. U gruboj analizi u taj otpad bi se mogao ubrajati dio elektronskog otpada, medicinskog otpada, teška ulja i naftni derivati. U mjerenjima provedenim u posljednjih godinu dana trenuni sistem prikupljanja i deponovanja otpada na prostoru općine Tešanj nije ugrožen rizičnim-opasnim skupinama otpada. Ne toliko opasan, ali prisutan i široko rasprostranjen otpad je elektronski otpad. U trenutnom sistemu brige o elektronskom otpadu u FBiH postoje operateri koji su registrirani za ove poslove. U 2014. godini je uspostavljena saradnja i organizirano u općini i svim mjesnim zajednicama prikupljen i odvezen elektronski otpad. Ugovor o saradnji je nastavljen i za 2015. godinu, ali je bilo problema u poslovanju operatera, te osim toga smanjenog interesa (zbog ranije prikupljenog otpada) za aktivnost u 2015.

17. Selekcija čvrstog otpada

U Bosni i Hercegovini prihvaćen je koncept regionalnog odlaganja otpada. To podrazumijeva da će tešanjaska deponija u dogledno vrijeme biti zatvorena i pretvorena u pretovarnu stanicu na kojoj će se dio otpada prikupljen na području općine Tešanj pretovarati u veće vozne jedinice i transportovati do regionalne deponije, a dio koristiti ili prodavati kao sekundarna sirovina. Troškovi prevoza bit će značajna stavka koju u konačnici plaćaju građani. Kako bi se ovi troškovi sveli na minimum nužno je da se razvije sistem odvojenog prikupljanja otpada da bi se izdvojilo što je moguće više iskoristivih komponenti iz otpada.

Strategija razvoja općine Tešanj 2018 predviđa **uspostavu reciklažnih ostrva** na području cijele općine. Projektom je predviđena uspostava i razvijanje sistema odvojenog prikupljanja otpada. Strategija razvoja općine Tešanj predviđa formiranje 10 eko-ostrva godišnje. Ovaj cilj predstavlja nastavak aktivnosti iz 2014. godine. Aktivnosti u cjelini prilagođene su nastojanjima da se sredstva obezbijede od operatera ambalažnog otpad . Urađen je projekat „Uspostava i razvoj primarne selekcije ambalažnog otpada iz komunalnog čvrstog otpada u općini Tešanj» u kojem su učesnici projekta općina Tešanj i JP «RAD» d.d. Tešanj, a partner u projektu udruženje «Eko-Mladi». Projekat je u formi prijedloga proslijeđen operateru ambalažnog otpada i Fondu za okoliš. U toku 2015. godine provedene su aktivnosti:

- Održan sastanak sa operaterom ambalažnog otpada „EKOPAK“ Sarajevo. Saradnja nije uspostavljena. Dogovoreno je da se razgovori nastave, a sadržaj razgovora je obezbjeđenje 15 eko ostrva
- Održan sastanak sa operaterom ambalažnog otpada „EKO ŽIVOT“ Tuzla. Operater je donirao 5 eko-ostrva koja se sastoje od po tri kontejnera.
- Obezbiđene lokacije i postavljeni donirani kontejneri.
- Urađena aplikacija za Javni poziv Fonda za okoliš. Aplikacija nije prihvaćena.
- Postignut dogovor općine Tešanj i JP „RAD“ Tešanj o održavanju ekoostrva do iznalaženja sistemskog rješenja.

18. Čišćenje vodotoka

Čišćenje, produblјivanje, proširivanje korita je cilj koji ima svoj kontinuitet i on se provodio i u 2015. godini kao jedan od ciljeva iz Strategije. Cilj se realizuje u smislu preventivnih mjera zaštite od poplava do sada je pokazao dobre rezultate naročito u 2014. godini kada je proglašeno stanje prirodne nepogode od poplava i klizišta. Za realizaciju ovog cilja sačinjen je Plan provođenja preventivnih mjera zaštite od poplava kojim je definisano 16 (šesnaest) projekata čišćenja vodotoka sa mogućnošću proširivanja iz razloga ako bi došlo do poteškoća kod realizacije pojedinih projekata. Sastavni dio ovog plana je raspored posjete predstavnika Službe

Red. br.	Lokacija		Radovi	Planirano		Utrošeno	
				Količine	Cijena	Količine	Cijena/KM
1	Rijeka Tešanjka	Medakovo kod škole	Čišćenje, uređenje postojećeg korita	30 m	120	30 m	120
			Izrada obaloutvrde	30 m ³	1500	108 m ³	3456
		Novo selo kod Kosovčića	Čišćenje, uređenje postojećeg korita	40 m	160	107 m	428
			Izrada obaloutvrde	50 m ³	2000	112,50m ³	3600
		Tešanjka kod vodovoda	Čišćenje, uređenje postojećeg korita	70 m	280	130 m	520
			Izrada obaloutvrde	87,5 m ³	2000	342m ³	10944
		Od Silka do Ušća Trebačke i Tešanjke	Čišćenje i uređenje korita rijeke Tešanjke	1100 m	1100	1400 m	1400
2	MZ Vukovo		Čišćenje potoka	50 m	350	140 m	560
3	MZ Rosulje		Čišćenje potoka	700 m	2500	115 m	460
4	MZ Bobare		Čišćenje potoka	650 m	2000	650 m	650
5	MZ Jelah Jelah-polje		Kopanje novog kanala	390 m	3400	210 m	840
6	MZ Dobropole-Meliš	Mekiš	Čišćenje Mekiškog potoka	250 m			
7	MZ Tešanjka	Kod vodovoda	Čišćenje korita Tešanjke i p	70 m			
8	MZ Rosulje	Od preduzeća Hidroring do preduzeća	Čišćenje korita Radušice	150 m			
				Ukupno za ova tri projekta plaćeno je :5830,00			

CZ i predstavnika MZ u smislu pojašnjavanja važnosti ovih projekata i preventivnog djelovanja kod eventualnih poplava, te dobijanja saglasnosti za radove od vlasnika parcela uz korito rijeke. Održani su sastanci

sa predstavnicima sljedećih MZ i to: Vukovo, Rosulje, Ljetinić, Medakovo, Šije, Tešanjka, Bukva, Jelah Bobare-Drinčići-Blaževci. Od ukupno 15 delegiranih projekta za njih 10 je dobijena saglasnost, od čega je realizovano 8, a za ostala 2 nisu realizovano iz razloga što nije bilo saradnje građana (saglasnosti). Planirano je 3030 m čišćenja i 167,5 m izgradnje obaloutvrde, realizovano je **3255 m čišćenja i 562,5 m obaloutvrde**. U finansijskom smislu utrošeno je oko 33.000 KM, a projekat je vodio Mensur Saletović.

19. Profesionalna orijentacija mladih na prelasku iz osnovne u srednju školu i iz srednje škole na fakultet/višu školu

Planiran i proveden dio aktivnosti na profesionalnoj orijentaciji u 9 osnovnih i tri srednje škole. Veći dio aktivnosti je planiran u drugom polugodištu školske 2015/2016. godine i provodi se paralelno uz pripremu i realizaciju Sajma srednjih škola i fakulteta. Koordinacija sa menadžmentom za sve škole sa prostora općine i usklađene sa planiranim Sajmom srednjih škola i fakulteta u 2016. godini.

Glavne aktivnosti koje su realizovane:

- Konsultativni sastanci i ugrađivanje projekta u godišnje planove rada škola.
- Dostavljanje priručnika profesionalna orijentacija "Pet koraka do izbora zanimanja" i materijala za radionice (decembar-januar)
- Povratne informacije od škola (konsultativni sastanci, izvještaji sa Aktiva direktora i pedagoga...)

20. Sajam srednjih škola i fakulteta (detaljnija i sveobuhvatnija prezentacija i promocija postojećih i dostupnih škola i smjerova)

Sajam srednjih škola i fakulteta (detaljnija i sveobuhvatnija prezentacija i promocija postojećih i dostupnih škola i smjerova). Tokom školske 2014/15. godine započete su pripreme za realizaciju drugog Sajma srednjih škola i fakulteta koji je održan 27.03.2015. godina. Cilj je bio da se na jednom mjestu okupe učenici srednjih škola i predstavnici fakulteta i akademija koje su na raspolaganju. Prilikom definisanja strategije željelo se na ovaj način olakšati svima (učenicima i roditeljima) u donošenju pravilnije odluke kod izbora buduće profesije, tj. izbora srednje škole ili fakulteta.

U toku realizacije Sajma realizuje se i dio aktivnosti cilja 19. "Profesionalna orijentacija mladihna prelasku iz osnovne u srednju školu i iz srednje škole na fakultet/višu školu. Tokom realizacije projekta uočene su prilike da se projekat unaprijedi i prisustvom drugih institucija i poslovnih subjekata (službe za zapošljavanje, pojedinih poslodavaca, asocijacija). Relativno malim sredstvima ostvaren je značajan društveni efekat, te po drugi put na jednom mjestu okupljeno 16 fakulteta, 6 srednjih škola, 9 osnovnih škola i 6 drugih institucija. Sajam su posjetili svi učenici završnih razreda osnovnih i srednjih škola sa prostora općine Tešanj i značajan broj roditelja. Menadžer projekta bila je Aida Salkić.

21. Uspostaviti savjetovalište za privrednike i servis "Sve na jednom mjestu"

Realizacija ovog cilja je ostvarena je kroz projekat COBEAR „Konkurentnost područja poslovne izvrsnosti“ koji realizuje TRA Agencija za razvoj općine Tešanj zajedno sa partnerima, a uz podršku Europske Unije. Osim COBEAR projekta podršku realizaciji cilja je pružio program GIZ Prolocal koji realizuje Njemačko društvo za tehničku pomoć i međunarodnu saradnju sa ciljem podrške lokalnoj upravi i ekonomskom razvoju. Vođa/menadžer cilja je bio Ismar Alagić. Kroz navedeni projekat, realizovano je sljedeće:

- opremljen prostor i nabavljena oprema za savjetovalište za privrednike i servis „Sve na jednom mjestu“ (u sastavu TRA Agencije, zgrada općine Tešanj, I sprat);
- usvojeno radno uputstvo za rad sa predstavnicima poslovne zajednice i investitorima;
- urađen grafički identitet Centra pod nazivom COBITES – Centar za investicije, trgovinske usluge i izvoz zasnovan na trgovinskom poslovanju;
- urađen promotivni letak COBITES sa osnovnim sektorskim pokazateljima za privredu općine Tešanj;

- uspostavljene baze podataka preduzeća sa pokazateljima poslovanja (promet, izvoz, broj zaposlenih i dr.), pokazatelji trgovinske razmjene općine, lista investicija i investitora;
- urađen set vodiča za investitore (radna snaga, poslovni profil, metaloprerađivački sektor, dozvole i odobrenja za građenje, takse i porezi, poticaji i dr.)
- izrađen Informator za investitore na BHS i engleskom jeziku;
- angažovana osoba za rad u COBITES-u na temelju provedene konkursne procedure.

Kroz navedeni cilj planirano je i da se u narednom periodu realizuje cijeli set aktivnosti koje su usmjerene na podizanje konkurentnosti MSP i izvoznika, obezbjeđivanje informacija za investitore, unapređenja javno-privatnog dijaloga, izradu promotivnih materijala za investitore, nastup na sajmovima i poslovnim susretima itd. U opremanje prostora i nabavku opreme uz stampanje promotivnih materijala utrošeno je 12.752,97 KM. Potrebno je nastaviti sa aktivnostima na jačanju COBITES-a radeći na njegovoj održivosti i nakon završetka COBEAR projekta.

22. Podići nove intenzivne zasade voćnjaka (autohtone sorte) uz izgradnju zaštite od grada/leda

Projekat „Podizanje nasada maline na području općine Tešanj“ se implementira od strane „TRA“ d.o.o. Agencije za razvoj općine Tešanj, finansiran je od strane humanitarne organizacije „Aid Charity al-Qatariya“, čiji je predstavnik u BiH Fondacija Waqf. Ugovor je potpisan 23.08.2014. godine u Tešnju između predstavnika Waqf Fondacije iz Holandije, sa predstavništvom u Sarajevu, „Aid Charity al-Qatariya“, humanitarne organizacije države Katar i „TRA“ d.o.o., Agencija za razvoj općine Tešanj.

Ukupna vrijednost projekta je 280.872,85 KM, kojim je predviđeno podizanje 37 novih zasada maline, te angažovanje agronoma na period od 2 godine, nabavka automobila i opreme za adekvatno praćenje i vođenje projekta, izrada brošura i organizacija edukacija za korisnike projekta. Planirano trajanje projekta je 2 godine, odnosno od 01.09.2014. do 01.09.2016. godine. Cilj projekta je da prati cijeli ciklus podizanja zasada maline- od momenta odabira kandidata, pripreme zemljišta i sadnje do prve berbe. Cijeli ovaj vremenski period je predviđena stalna podrška agronoma svim korisnicima projekta. Praćenje i savjetovanje kroz svaki ciklus proizvodnje, odnosno uzgoja maline. Stalno terensko praćenje stanja, organizovanje edukacija, rješavanje problema na licu mjesta, preventivno djelovanje itd. Sve ovo ima za cilj stvaranje jakih i sposobnih poljoprivrednih proizvođača. Fokus projekta je na nezaposlenim osobama, osobama sa niskim ili nikakvim primanjem, pripadnicima boračke populacije ili neke druge osjetljive kategorije stanovništva.

Ciljane grupe ovog projekta su:

- Porodice teškog ekonomskog položaja
- Višečlane porodice
- Porodice bez primanja ili sa niskim finansijskim primanjima;
- Pripadnici boračke populacije
- Šehidi i žrtve rata
- Porodice osoba sa invaliditetom

U proteklom periodu postavljeni cilj nadmašen za 35% na način da je podignuto 50 nasada (jedinične veličine 0,2 h). Tokom proteklog perioda realizovani su slijedeći sastavni dijelovi projekta:

- Podignuto 50 zasada maline (po principu nabavke svih potrebnih stavki) i njihovo godišnje održavanje
- Angažman agronoma i nabavka opreme za realizaciju projekta
- Nabavka automobila uz troškove servisa i utroška goriva
- Administriranje projekta
- Izrađena Brošura i održane edukacijske radionice za farmere

U proteklom periodu utrošeno je cca.82% sredstava projekta i za naredna 3 kvartala preostalo je izvršiti dopunu đubriva i zaštitinih sredstava, uz stalan nadzor agronoma i edukaciju farmera. Predstoji prva berba i plasman uroda.

Sa svim farmerima su potpisani ugori o povratu uloženi sredstava kroz godišnje rate do maksimalno 15% od godišnjeg uroda do momenta povrata cjelokupne investicije. Od 15% povrata investicije, iznos od 5% predstavlja trošak agronoma, a 10% se usmjerava u nove nasade. Prema postojećoj evidenciji u dosadašnjem periodu je uloženo 135.279,30 KM u 50 farmera (postoji evidencija za svakog pojedinačnog farmera), uz napomenu da je procjena dodatnih ulaganja u narednih 8 mjeseci slijedeća: 6.000 KM u mineralna gnojiva i 12.875 KM u zaštitna sredstva.

23. Izvršiti rekonstrukciju Titove ulice i urediti prilaz Starom gradu

Cilj projekta je uređenje čaršije i prilaza Gradini kao turističkog potencijala kao i povećavanje funkcionalnosti saobraćajnice. U planu je bilo da se kroz faze realizuje projekat uređenja prilaza Gradini te nakon sticanja mogućnosti da se ide u implementaciju projekta restauracije Titove ulice (ulica uz Čaršiju).

Rekonstrukcija Titove ulice:

U ranijem period urađen projekt rekonstrukcije Titove ulice, cca 13.000 KM. Kroz projekat izgradnje prve dionice kanalizacije a što je bio i jedan od uslova za rekonstrukciju Titove ulice uobzirena i kompletna realizacija projekta. Za vrijeme rekonstrukcije i drugi operateri su rekonstruisali svoje vodove, (Bhtelecom, Elektroprivreda, Toplana) dok je općina u sastavu projekta 1. dionice izgradnje kanalizacione mreže rekonstruisal i fekalnu i oborinsku kanalizaciju, te ranije azbestno-cementne cijevi zamijenjene novom vodovodnom mrežom. Nakon izgradnje i rekonstrukcije podzemne infrastrukture zvršena je kompletna sanacija kamene podloge U Titovoj ulici i dijelu Trga Gazi Ferhat-bega. Ukupna vrijednost radova na instalacijama je cca 230.000 KM i realizovana je kao donacija u projektu WATSAN, iz IPA fondova, dok je ostatak potrebnih sredstava obezbijeđen kroz ugovoreni kredit na ovom projektu.

Uređenje prilaza Gradini:

Još u ranijem period se krenulo sa uređenjem prilaza Gradini što je prvobitno isprojektovano, 8.000 KM

- Urađena I faza (izgradnja stepenica) ulaza u Gradinu, 57.000 KM,
- Obezbjeđena su sredstva i ugovorena naredna faza uređenja prilaza Gradini, 55.000 KM. Nije realizovano u drugoj polovini 2015. godine zbog radova na uređenju i rekonstrukciji Titove ulice. Početkom građevinske sezone planirano je izvođenje 2. faze projekta.

Tržnica/pijaca

U toku je izrada glavnog projekta uređenja tržnice/pijace. Uređenje tržnice već je kandidovano prema međunarodnim fondovima, konačan odgovor još nemamo. Menadžer projekta je Sabahudin Omerbašić.

24. Obezbjediti uslove za predškolski odgoj

Izgradnjm novog objekta biblioteke, oslobođen je prostor u objektu obdaništa. Općina je izvršila nužnu sanaciju i objavila javni poziv za korištenje navedenog prostora u namjenu predškolskog odgoja. Težnja je da se objekat koristi za prvobitnu namjenu, a budući da imamo više privatnih igraonica, iz sredstava zakupa, namjera je da povećamo finansijsku podršku razvoju predškolskog odgoja na prostoru općine Tešanj. Postupak javnog poziva je još u toku. Menadžer projekta je Azra Muslija

25. Projekti izgradnje potrebnih sportskih terena

Projektom završetka nove sportske sale na Musali (bivša sala „Partizan“) obezbjedili bi se bolji uslovi za potrebe treninga sportskih klubove dvoranskih sportova ali i za građane za amatersko i rekreativno bavljenje sportom. U 2015. godini, planirano je i realizovano, vanjsko uređenje zgrade- fasada i stolarija, što je iznosilo 68.000KM (30.000 Općina, 38.000 JU SRC). Izvršena je promjena projekta u dijelu suterena objekta, (izmjenjena namjena) te je umjesto planiranog prostora za fitnes isprojektovana streljana za vazdušnu pušku i pištolj na udaljenosti mete od 10 metara. Završetkom ovog projekta obezbjedili bi se potrebni uslovi i dugoočekivani prostor za streljačke klubove kako bi ovaj olimpski sport razvijali na našim prostorima. Za

završetak unutrašnjih radova streljane i sale potrebno je 140.000 KM. Kako bi se obezbjedila potrebna sredstva, pripremljena je aplikacija na javni poziv Federalnom ministarstvu kulture i sporta te projekat nije podržan. U 2015. godini, u sklopu ovog cilja, planirana je i realizovana nabavka stolova za stolni tenis s kojima je proširena usluga Ustanove.

U 2016. godini pored planiranih sredstava za završetak nove sale i streljane (iz budžet Općine 30.000KM + SRC 50.000KM) potrebno je još oko 60.000KM. Menadžer projekta bio je Safet Jašić.

26. Smanjiti potrošnju vode

Poznato je da općina Tešanj nema na raspolaganju dovoljne količine vode za piće te da povećanje raspoloživih količina ne prati u adekvatnoj mjeri ubrzani razvoj vodovodne mreže. Stoga je smanjenje potrošnje vode u domaćinstvima jedna od bitnih mjera za ublažavanje problema. Preliminarne analize potrošnje vode u općini Tešanj po domaćinstvu pokazuju da je potrošnja ispod prosjeka u odnosu na podatke iz regiona i šire. Iz dosadašnjeg iskustva poznato nam je da potrošnja vode za vrijeme najvećih vrućina, kad je imamo najmanje na raspolaganju, izrazito se povećava, što ukazuje na potrošnju vode za namjene koje su izričito zabranjene Odlukom o vodovodu i kanalizaciji.

Za realizaciju postavljenog cilja u toku 2015. godine provedene su sljedeće aktivnosti:

- Izrađena detaljna analiza potrošnje vode po kategorijama potrošača.
- Izrađena i štampana u 10 000 primjeraka edukativna brošura o smanjenju potrošnje vode u domaćinstvima. (troškovi štampanja i distribucije – JP „RAD“)
- Edukativna brošura distribuiranja korisnicima JP „RAD“ d.d. Tešanj, đacima osnovnih i srednjih škola te mjesnim vodovodima na području općine Tešanj.
- Objavljeno 9 apela građanima o potrebi smanjenja potrošnje vode zbog nedostatka vode u sistemu usljed suše. (nisu primjećeni pozitivni efekti objavljenih apela).

27. Sajam voća i meda

Tokom 2015. godine urađen je prvi dio posla kako bi se tradicionalni sajam meda, koji organizira Udruženje građana proizvođača meda, proširio kao aktivnost na prodajno izložbenu smotru koja bi uključivala i voće, od autohtonih sorti do savremenih trendova u proizvodnji i preradi voća. Realizirani su određeni sastanci na ovu temu, iskazana je i određena doza spremnosti ali u 2015. godini nije došlo do ove aktivnosti.

Rezime

Implementacija Strategije razvoja je plansko i organizovano usmjeravanje razvoja zajednice. Bez obzira na vrlo čestu ograničenost resursa, na specifične okolnosti vrlo je važno za zajednicu da se ne izgubi usmjerenost na budućnost i rješavanje glavnih izazova ili problema. I 2015. godina je iskorištena za dalji razvoj općine shodno opredjeljenju cijele zajednice predstavljenom u Strategiji razvoja. Neki projekti su završeni, neki započeti, neki programi razvijani intenzitetom koji je bio uslovljen okolnostima. Moglo bi se reći da je 2015. godina obilježena nekim aktivnostima i projektima iz kojih se vidi posvećenost općine Tešanj realizaciji strateških dokumenata.

Obezbijedeno je značajno učešće vanjskih izvora u finansiranju strateških ciljeva općine (EU sredstva, donacije međunarodnih subjekata, donacije privatnih lica, sredstva viših nivoa vlasti putem javnih poziva, itd.). Treba reći da je profesionalnim angažmanom određenog broja ljudi, ali i volonterskim i predanim uključenjem velikog broja aktera ostvaren značajan napredak.

Općinski načelnik

mr. sci. Suad Huskić